

聖宋名賢五百家播芳大全文粹卷三中

表辭免表 郡王司空使相昭文相公大資

辭免進封郡王表 代

曾子固

寵踰於德愧甚於榮輒露危誠仰千睿聽中謝竊以  
衮衣備物禮均上宰之崇土宇分封位列真王之貴  
非智能足以謀國勞烈足以及人屬在休明詎容玷  
冒若臣者侗然固陋耿爾穉蒙雖甫逮勝衣習為容  
於趨拜而方思就傅賴齒學之漸磨庶幾識古今之  
通方知國家之大體施於為已可以持循必也當官  
既無違曠已叨分於將鉞復誤假於公圭虛冒洪私

未申薄効嚴圖獎渥薦及謏微視儀數於三台超爵  
名於五等既加真食仍益爰田固非錄善而量能又  
異校勞而數最將安稱此自顧缺然而況皇帝陛下  
處父子之間常先義訓在君臣之際每詢詢公言伏望  
察臣精懇之愚衷不顧小嫌之反汗許還新命俯遂  
微情使臣得奉定省於辰昏稍安幼志報生成於天  
地更得壯年

辭免司空表

王介甫

隆施所逮懇辭弗俞輒冒大威更輸微款中謝竊臣事勞  
無紀操行不修居竊萬鍾初未知於辭富坐彌九載

方有俟於黜幽豈圖邦命之新尚眷求人之舊寵靈  
覃被危厲增加位高疾顛力少任重實前修之切戒  
敢小醜之冒膺仰冀睿明願辭衰朽改焉非服免貽  
官謗之憂宥以罔功使獲里居之樂秩

辭免使相表

前人

恩典有加事勞弗稱陳力況難於匱勉輸情終冀於  
哀於中謝伏念臣晚出窮鄉首陪興運恕心量已雖  
知容膝之易安營職趨時更似絕筋而稱力既及既  
衰而成疾重遭憂覺以傷生姑欲補完唯當休悒若  
任州藩之寄仍兼將相之宗是為擇地以自營非復

籲天之素志伏望追還渙號俯遂愚忠許守本官退  
職先土豈令積歲參大議於廣朝由賜誤恩食舊勞  
於外觀尚繫春獎非敢干祈

辭免使相表

王介甫

以病自陳度全於私分蒙恩幸許尚竊於隆名淪肌  
雖荷於幽優容省已終難於叨昧輒披情素上冒聽聞  
中謝伏念臣久玷近司迄無明効終蒙解免實賴保  
全自顧衰體已難勝於勞勩數違明詔實仰冀於矜  
憐號兼將相之宗身就閭里之逸誤恩若此前載所  
無非惟私義之難安固亦公論之弗與伏望皇帝陛  
下深垂簡照俯徇虔祈特回渙號之已孚許以本官  
而免使如此則上足以成陛下徇名之政下足以免  
愚臣冒寵之慚

辭免使相表

愚誠屢黷方負憂競聖聽未移更加獎勵故仰關於  
國體敢終冒於天威中謝伏念臣頃汙近司久虛大  
受晚罹疾疢自當辭祿而里居尚恃眷憐故敢祈恩  
而家食將相之為重寄朝廷之所具瞻若免於事任  
之勞而尸此名器之寵在昔之茂勳明德尚莫敢居  
如臣之綿力薄材豈宜所據伏望陛下俯矜危懇追  
寢誤恩豈惟私義之所安是固物情之眾允

辭免昭文相公表

為君所難報尤謹厥與命相不善將壞於成矧當責實之時敢替知難之義中謝竊臣知不足以及遠學不足以窮深比誤國恩嘗尸宰事初無薄效稱萬一之褒揚止有多言煩再三之辨釋終逃譴負實賴保全恭惟皇帝陛下若古之堯以欽明御今以禹之勤儉於修積美山無一簣之虧因任致隆臺有九層之累小大祇若遐邇允懷奮而不蓄雖或許其國事灌以既邑豈不昧於知時况惟夜疲曳之餘過重休明之累且用人而過矣固不免於敗材苟改命而當焉亦何嫌於

及汗敢期聖哲俯亮愚忠

辭免資政殿大學士表

錢參政

自天有命無他措躬伏念臣濫側闕班行驟膺顯擢躡登樞筦參預政機感超異之遭逢思糜捐而稱塞歲時更歷天日照臨因造膝之敷陳露乞骸之懇請仰戴慈憐之厚曲彰覆護之深昭示隆私寵頌異數力辭得獲微分少安席未煖於里閭詔促臨於藩屏南徐効力初靡著於顯庸榮北闕疏恩已復加於美職深惟忝竊倍劇凌兢敢圖簡記之隆更付保釐之託守齋再經於春首撫封常廟於夙心罄殫朝暮之微勞

酬答乾坤之大造十連無事實自朝廟謨庶政罔功方  
憂吏責退欲申於前牘進忽奉於除書隆名升規殿  
之新寵命渙帝綸之舊恩誠厚矣臣實懼焉伏惟皇  
帝陛下廓淵聽以下臨鑒愚衷之上達使遂終辭之  
志不嫌申命之回得請為期俯躬以俟

辭免資政殿大學士表

恭馳牘奉已罄臣衷敬拜璽封未蒙帝可再陳悃幅  
重犯威尊竊以敝違宇以崇儒自本朝之建立褒異  
庸而賜職乃今日之舉行與既不輕得而為貴因殿  
額榜題之差次序臣隣班立之後先既列綴以冒居

復階升而序進疾而恐躡退則能安伏念臣濃受恩  
知恨無報効重膺委寄思有服勞雖食息之靡遑勤  
而無補況精神之易竭力則難勝眷東西府境之連  
萃南北軍屯之衆兵民雜處農賈萃區貴慈惠以拊  
循要威名而彈壓藉九重之覆若幸數載以安然毫  
釐莫積於事功方寸但思於田里寂爾二邦之績穹  
然兩殿之華循名既高責實甚淺必難虛授是固敢  
辭伏望皇帝陛下照懇避之忱誠賜收還之詔旨施  
於有政既資助之無聞必也正名恐祇承而弗副竊  
煩冒昧戰越驚惶

持老

門下侍郎 左右丞 起居舍人 吏侍 史官  
辭免門下侍郎表 劉莘老

發政西臺無裨於聖治陞班東省忽需於恩書揣分未安控詞自列中謝竊惟先王制爵祿之等以待賢能而君子謹進退之方必循理義臣起於寒晚躡至顯嚴獨恃聖明特達之知不緣黨友更相之助虛塵近轉輔更涉累年愚而直者人情之易睽公而固者眾怨之所聚每幸曲蒙於善貸保此孤危豈敢更冒於誤恩遷其位叙上乘朝廷陟明黜幽之典下至臣子見得忘義之譏伏望太皇太后陛下謹名器以申大公明勸懲以厲百辟收還成命改授有勞臣無任

辭免門下侍郎表

前人

勞能不聞名品益進懼必投於顛仆敢冒貢於誠情中謝竊臣進德不彊造道甚近逡巡循尺寸之守遭會聖神之知少負丘山莫報之恩初無絲毫可紀之善粵參大政及今驟至於四遷升置東臺所歷遂周於三省益高股肱之任況備喉舌之司爵視上公邑增真食倘罔功而濫處實累國以起羞伏望皇帝陛下如日燭幽體天成物察臣表裏之既盡矜臣器量之已盈特收誤恩以允清議

辭免門下侍郎表

蘇子由

久塵右轄無補於時進貳東臺有慙在列言莫宣於  
誠意聽未敢於高明中謝竊伏念臣頃以虛名謹蒙收錄  
旋塵近侍非有勞能咀唯文詞本腐儒之事業彈治  
邪枉犯衆口之憎嫌及夫進貳文昌日侍軒闥隨衆  
出入得失何補於萬幾奉行文書勉強自慚於期歲  
此則聖主之所親見孤臣之所自知豈待人言難逃  
天鑒敢謂超升累級復進宗階雜用負乘行自招於  
寇盜未嘗狩獵食何取於鷄豕伏望太皇太后陛下  
因功以舉賢選衆以拔士采其譽者必攷其實聽其  
言者皆原其心如臣空疎自難隱伏特追成命以慰  
公言使聖朝無失於用人則臣愚若蒙於厚德

辭免門下侍郎表

喉吻之任密侍於禁中綸綍之行風傳於海內苟用  
人之失當於累上以非輕中謝竊伏念臣西南陋儒墳史  
樸學非有過人之大節惟守事君之小心無其實不  
敢居其名非其任不敢竊其祿仕歷三世年逾半生  
奉以周旋未始失墜今者乃欲以尋尺之材居棟梁  
之任以斗升之量受鐘鼎之藏雖欲欺君且非本志  
矧復躡等超累級之上遷秩非舊比之常靜請言以思  
未見其可伏望皇帝陛下因任庶物照臨百官短長

各盡其宜大小無失所養必其力有餘而後用則有  
任逾久而常新抑將多士皆賴以安豈惟微臣獨被  
其賜愚衷已竭天聽尚回

辭免尚書左丞表

劉莘老

竊以國之爵祿以待賢能士之進退必循名義有或  
異此何以示民中謝伏念竊臣綿力薄才至愚極陋此蒙  
誤寵擢備近司之宏遠之規模空銷疲於精銳未嘗  
小補方俟大訶敢期恩憐更進位序考其歲月則既  
非久次課其職業則又無顯勞倘輒冒居實干清議  
伏望皇帝陛下慎名器以厲在位明是非以正其功

深察誠言許伸愚分無難反汗之命庶拯臨淵之憂

辭免尚書右丞表

蘇子由

臺轄之重國論所存顧惟尺寸之材何與棟梁之選  
比陳誠懇尚閔俞音中謝伏念竊臣家世寒儒僅守父兄  
之樸學文史末技不通邦國之大猷頃自元祐之初  
偶緣乏使召自南遷之後遽責使言旋由左史而踐  
掖垣復從右戶以居翰苑迨茲執法曾未數年言何  
補於聖明志已殫於憂責以一日遭逢之幸擅諸臣  
積累之榮方懷滿溢之虞願求閒散之便豈意思私  
之橫被復叨丞轄之近班自昔政事之臣非處書生



之地既犯不韙其何敢安伏望皇帝陛下以德愛人  
量材付位深察斗筲之陋難堪鐘鼎之藏追還誤恩  
選建明德俾賢愚各安其所則中外無復間言其於微  
臣受賜多矣

辭免起居舍人表

張文潛

言動之職最近清光儒學之臣以為榮選臣孤平晚  
進駑散薄材擢自選人置之太學復天祿石渠之職  
首預選掄紬金匱玉版之書兩領著作功能何有屏  
退所甘加以冒昧史官頗糜歲月論次故事未就簡  
編何有賢勞遽叨獎擢浸階華近入侍禁嚴內循弱

植之易搖實懼多言之可畏敢傾誠懇祈止誤恩免  
進顛躋更累樂育

辭免吏部侍郎表

邵公濟

聞命震驚罔知所措中謝竊以從索清職賴獻納之  
忠規銓衡劇曹資疏通之藻鑑欲當此選宜得其人  
如臣涉學非優賦資甚蠢蠢誤叨睿擢進陟臺端雖言  
聽諫從每蒙於睿獎而力綿責重實懼於顛躋自知  
無補於涓埃方欲退欣於閒散豈期庸陋忽玷還除  
仰丐皇明追還渙汗別東求於時彥用少慰於輿情

辭免史臣表

秦少游

史屬之除聖朝所慎若非承父兄之教詔世守其官則必積師友之淵源材充厥職臣於二者實無一堪聞命若驚撫躬增懼重念臣少而愚賤長更屯奇積累歲時尚慮人情之未與趨踰近分豈為物議之所容以蕞爾不勝任之材處灼然非所居之地必招官謗上累恩私沉儒館之中資任高於臣者不少班行之內學術過於臣者甚多與其容菲薄以濫居不若擇英豪而改授伏望聖慈追寢新命帥守蔡君謨伏念辭免權三司使表地親任重寵數殊優資薄才微公議非允中謝竊臣

向由樞職出治泉山奉高年之慈親還養於舊里昨承詔旨遂還京師屢降德音不容讓免驅馳百舍之遠趨伏九閣之嚴曾未達於近畿復遷處於大計天下通流之術非小智可以營為禁中命令之詞非空言可以潤飾加以支離之悴久辭辭浩劇之權今所領者益繁顧於力而不逮苟失量度是謂暗愚伏望皇帝陛下特收渙汗之恩更擇長材而用俾違要重庶得安全有祿庇身固能自足懷忠効國誓竭素心

辭免節度使表

郭師禹

抗章避寵冀回擁節之華賜札疏榮益重循牆之愧

俞音尚閔揣已奚堪敬伸螻蟻之誠洵瀆高明之聽  
中謝竊以爵為勸賞蓋在厲世之方器以褒嘉光謹  
假人之戒矧渙號敷廷之制而齊壇授鉞之儀非有  
旂常可紀之功曷稱明時甚盛之選伏念臣受材謏  
薄賦性顛蒙猥忝舊嫻陞朝著參扈帶高華之列  
綴甘泉法從之聯徒以樸忠每蒙睿簡昨朝恪奉曾  
何益於涓埃琳館均間采切慚於尸素深懷滿盈之  
咎粗堅止足之私敢謂公微誤膺顯擢晉公社主腴  
之異數昭龍光眷獎之非常忝冒難勝顛隳是懼伏  
望皇帝陛下離明委照乾造無私俯垂從欲之仁收還  
成渙改畀元勳之彥庶穆輿言

辭免節度使表

汪彥章

引疾辭榮方幸機衡之解疏恩越等遽蒙旄節之頒  
慄如淵谷之臨莫測雲天之施輒布由衷之懇仰干  
方命之誅中謝竊臣承學缺如起家寒甚早被聖神  
之遇遂參丞弼之司黽勉十年周旋二省妨賢最久  
自知罪戾之盈容跡每安置賴恩憐之至比失衛生  
之理益懷誤國之憂力丐投閒僅蒙賜可所願退安  
於散秩敢圖併授於隆名惟齊鉞臨師乃人主待有  
功之士而詞庭置使亦朝廷優元老之臣顧平時猶

懼於素餐豈病質乃堪於微數伏望皇帝陛下不忘  
舊物深諒微忠量材能小大之宜盡此覆始終之意  
特回洪號靡速煩言未泯餘生尚可筋骸之強誓堅  
晚節仰酬禮體之優

辭免都督江淮軍馬表

張德遠

江淮重寄猥出異恩犬馬餘生蓋安微分輒上臣愚  
之請未蒙制可之音中謝伏念竊臣少不如人老將及耄  
一士賢百萬之眾素乏脩能百里半九十之時仍當  
末路倘進退不懲於迷復則鬼神將害於福謙顯罹  
噴有之言重玷并包之度沉明光之口雖陳於別塞

而赤白之囊不徹於甘泉分屯已固於長城申命何  
資於錫鉞伏望皇帝陛下擴日月之照推天地之恩  
俯憐視蔭之幾何時加全護不憚出綸之惟反曲賜  
矜從

辭免資政殿大學士知隆興表

黃德潤

漚螻蟻之誠冀回淵聽渙絲綸之布尚閱俞音義不  
違安須至再瀆中賀竊以陳力就列人臣當自揣諸  
心量能授官君上亦必唯其當有如潛藩巨屏秘殿  
隆名甚非么微所克充負荷而沉適茲虛次妙於東求

豈無方面之才以稱當宁之寄鎮撫所係恩意非輕  
猥以屬臣敢不祇命重念臣叨竊久矣報塞蔑然雖  
中外之任不殊而知能所効則一感洪恩之優渥撫  
小已以凌競伏望聖明特賜俞允重優賢之禮毋以  
妄加念謀帥之難必求已試

辭免翰林學士知開封表

蔡君謨

大明臨下無遠裔而不均零露墜霄雖微物而必潤  
俯承賜命彌用震驚伏念臣向<sub>自</sub>掖垣擢司京邑上  
賴清光之燭終依全度之仁屬私便於庭闈遂求補  
於閩粵尋膺朝綍出守泉山首尾五年更移兩郡親

咸歲時之樂足慰母心阡塋<sub>雖</sub>省之勤屢躬先祀非  
繇孝治之廣曷為天幸之多惟臣賤微感疾滋久藥  
石攻治之愈至根本堅牢而未除日月因循筋骸<sub>惟</sub>  
悴深畏曠官之責方潛退處之圖敢謂伏蒙皇帝陛  
下曲貸素餐復加恩數禁林近職儒者最榮都輦要  
權吏之高選併疏寵渥猥連孱庸揣材幹之非優顧  
福基之甚薄苟貽過<sub>益</sub>濫之咎實虧分量之知重念臣  
仰違法座之嚴荐易周星之次懇出入於省闈每意  
在於本朝今此召還適當趨進然而慈親垂老於義  
不可以遠行病體至羸於力不堪其劇任願特收於

成命俾再典於舊封唯是危微誠終期得請

進辭免正議大夫表

司馬君實

天中需澤近輔書勞亦及罔功豈宜虛受中謝伏念竊臣

素無他技唯繫孤忠誤蒙累聖之知寢服近僚之列

頃因人乏進貳宰司先帝審訓羣臣靡預誓言之未

陸下嗣膺大寶曾無翊戴贊之勤豈復畏於多言詎敢

當於懋寵矧乃方任人而立政惟即命以記功將深

戒於官師宜先從於近始伏望皇帝陛下慎持名器

申勸臣鄰收出綽之過恩亮循牆之愚懇爵惟馭貴

免上累於至公賞必及勞蓋率由於舊典

辭免覃恩轉階表代

汪彥章

便藩之寵弗許固辭震懼之懷終難幸安處敢再輸於

危懇庶有概於淵衷中謝伏念竊臣猥自周行獲陪興運

未閱半暮之久已躋二府之崇雖鴻私務極於生成

而小器日憂於盈滿矧國步艱難之後茲人臣隕越

之時詎可包羞唯知冒進故屢上縷陳之牘願必還

汎進之階子雖幸於父知天未從於人欲伏望皇帝

陛下特垂簡照無拘彝章念微臣事主者既本至誠

則聖主待臣者何憂不貴肆頌明詔進寢誤恩免疏

遠之孤踪速僭差之大戾使鶴鷺共由之路循次而

升則桑榆未盡之年皆君所賜

辭免南郊陪位表

王介甫

萬國駿奔煒上儀之殊觀一夫幽屏叨明命特之特  
伏念臣竊祿已多冒恩最渥自致惓惓之義實有素  
情再瞻穆穆之容豈非榮願而蕭然暮景嬰以沈疴  
伏歆畝以負薪於今未已侍壇垓而踐豆用此為妙

辭免明堂陪位表

歐陽永叔

合宮大啟爰講於上儀明詔忽頒俾祇於嚴召被恩  
言之優渥撫病質以競榮中謝伏惟皇帝陛下聖  
聰明憂勤慈儉遂羣生而涵育臻至治於和平乃因

萬物之成秋爰即九筵而展禮陟降薦獻百官以職  
而各供膺受福釐一人有慶而成賴而臣近辭印紱  
方伏田廬當與庶民並蒙餘澤敢期睿眷尚錄孤孱  
俾陪在外之臣來預侍祠之列載念臣自緣災疾幸  
獲退休殆未逾時尚嬰舊苦雖朝廷禮樂之盛得與  
者為榮而犬馬筋力之衰告疲而已久既不得於策  
勵姑自信於奇屯太史滯於周南惟知數命子牟存  
於魏闕但極馳心

辭免明堂陪位表

張文潛

明德惟馨方格神於盛禮相予肆祀俄賜召於老臣

衰朽知榮競惶靡措中謝伏惟皇帝陛下嗣隆聖統  
躬致太平翼翼文王之小心烝烝虞舜之大孝季秋  
順序方萬物之盛多四方和來喜多士之奔走祇見  
列聖哀對昊穹敬布政之法宮大明禮樂受丕天之  
景貺均被爾遐喜交神人慶浹夷夏凡執事豆籩之  
未或觀光輿隸之間足為至榮可以無恨而況臣猥  
以屏退尚叨既存溫詔在門外慶有位固願聞舜韶  
而率舞瞻堯日以傾心而遲暮之餘衰疲且久筋力  
已消於疾病才異莫盡盛年疏野久放於田間不足為禮  
當千歲之接統自滯周南奉半夜之受釐莫趨宣室

無階策勵惟劇飛馳

辭免起復太宰表代

王豐父

苦由餘生已濱死所絲綸渙號俾復書班勅使薦臨  
德音下逮呼天號絕拊已驚迷伏念臣早偶家艱專  
承母訓零丁孤苦邈爾無依鞠躬提攜迨夫有立夤  
緣際遇玷冒高華犬馬之養未伸風木之悲遽至攀  
號泣血摧踊殞心仰賴聖神之恩甫終窀穸之事几  
筵是奉墳土未乾痛深陟屺之瞻恨未見泉之及敢  
謂哀哀念舊優詔奪情蓋年三免懷通喪者聖王之  
制而踰月視事變禮豈治世之風雖睿眷之殊常豈



私情之所忍伏望皇帝陛下推孝思而錫類慎值宰柄以馭臣念哀苦之方深沉衰疲之已甚報親日少願終制以為期事國時長願捐軀而未晚

辭免起復太宰表代

方席薪而枕塊於義為安俾服冕而乘軒共知不可哀情薦布宸聽未回再殫罔極之情冀動蓋高之聽伏念臣猥蒙天眷誤玷宰司久無補於明時亟自招於大禍慈顏遽隔悲隙四之難留原宥甫成倚苦廬而永慕庶畢哀恫之制少酬顧復之思忽奉制綸俾還相位私情莫處公議靡容豈可遵故事以蹈前非

但當守禮經而據古是臣重罹酷罰屬在衰年既極摧殘浸成疾恙精神徒耗筋力頓衰雖強使之造朝決難堪於應務伏望皇帝陛下委大明之照闕不移之愚追寢渙恩俾終祥禫則聖主得全於禮貌而孤臣獲畢其孝思疾首痛心或偷生於茲日銘肝鏤肺期報德於他時臣無任

辭免起復太宰表

泣血陳辭仰祈聰聽批章示訓尚閔俞音涕泗無從回皇失措伏念臣人非適世壯本為親密蚤困官途頗闕晨昏之奉晚逢真主方欣甘旨之榮俄纏樂棘之

悲永負劬勞之報呼天靡及觸地無容強食勝喪空  
驚過隙之駟感時追往更傷反哺之鳥敢意勅使薦  
臨德音嗣降雖君命召固難俟駕而行念人子情不  
忍短喪而出矧今耆老在上忠賢繼登外無兵革之  
虞內有禮樂之備事得其序功已告成則焉用於愚  
臣俾固違於典禮伏望皇帝陛下大明旁燭至德兼  
容俾酬慈母之恩俯遂匹夫之志哀非一字已同華  
袞之榮誓畢三言庶幾素冠之刺

九月二十日自水向視塔地回秉燭投畢

聖宋名賢五百家播芳大全文粹卷三中

聖宋名賢五百家播芳大全文粹卷三下

謝表

授宰相

謝除右僕射表

王介甫

貳政中臺兼官左省惟時遴選蓋嘗久曠而弗除忽  
此叨居顧豈微勞之可稱陪敦厥邑敷告於廷是皆  
至榮難以虛辱臣中謝竊以經術造士實始成王之  
時偽說誣民是為衰世之俗蓋上無躬教立道之明  
辟則下有私學亂治之姦氓然孔氏以羈臣而與未  
喪之文孟子以游士而承既沒之聖異端雖作精義  
尚存逮更燼煨之災遂失源流之正章句之文勝質

傳注之博溺心此淫辭詖行之所由昌而妙道至言之所為隱篤生上主純佑下民成能協乎人謀將聖出乎天縱作於心而害事放斥幾殫通於道以治官延登既眾尚懼膠庠之黎獻未<sup>昭</sup>典籍之羣疑乃集師儒具論<sup>科</sup>指繕書來上褒典俯加臣趣操弗高知識尤淺少嘗勤苦但為表氏之吟晚更髦衰豈免輪人之議初備使令之乏即知稱愜之難敢意誤恩獨當殊獎此蓋伏遇皇帝陛下以化民成俗為事故急在誨人以尊德樂道為懷故易於糜爵因<sup>忘</sup>恩固陋特假龍光祇服訓辭深惟報禮雖無博學對揚稽古之

鴻名庶以雅言助廣右文之美化臣無任

樞密謝除樞密表

張全真

視草無聞已玷嚴凝之直出綸甚寵遽陪密宥之謀錫秘殿之隆名進文階之顯秩循牆固避渙汗莫回中謝伏自兵威既挫於北敵之強國勢益微於南渡之後眾類傷弓之鳥將猶飽肉之鷹念郊壘之風塵想籌帷之豪傑時開真主固有以駕馭於英雄事總天營又有以統臨於將帥至於參貳樞極幾亦奉行文書曾是艱難豈容尸素况如臣者才極下中之品進無左右之容挾策讀書居慚軍旅之末學涖官行

法粗安州縣之徒勞由誤簡於冕旒遂濫陪於簪橐  
任論思獻納之寄訖何補於聰明更文章翰墨之遊  
但徧塵於親切每憂踰分屢丐投閒敢謂眷禮有加  
鴻私未憖付以本兵之重試其經武之長倘非効節  
於糜捐何以分憂於宵旰此蓋伏遇皇帝陛下撫育  
萬宇焦勞百為從善如轉圜已兼收於衆智與人不  
求備曾罔棄於寸長遂令樗櫟之姿亦廁機衡之任  
痛遠人之阻循頊化終期尺筆之答來羣策以宣防秋敢急  
寸陰之惜尚幾小補以答萬分

謝除樞密表

宋子京

叨膺茂典入筦鴻樞伏省戶以陳章丐締囊之收需  
危惛再瀆明制必行懼煩失以致尤輒進思而冒處  
中謝臣聞佐王基命簡在臣鄰秉軸居中本之柄兵  
非有號令風采為下所瞻則必幅臆謀謨熙天之載  
異於茲道孰匪曠官竊念臣材散無庸地寒寡援興  
顏行之下因得累勞陪周衛之中罕嘗進熟見容漢  
皇之度久總軒師之營貳掌繁機佐經中寢會落成  
之不日因委祀以祈天汪濊深仁導迎協氣而臣弗  
從災異之免更加名器之多寢嘿懷安委蛇就列內  
循無狀自愧說必酬何月律之未淹沐天私而載造權

於末綴遂正近司輒成奏以讓還在深辭之切救薄  
言匪控進拜增羞助百姓之昭明行虞辱國千六符  
之疏濶舉畏談天斯善皇帝陛下養以至仁赦其少  
戇同五帝之親事不及有司俾一介之孤臣無空大  
位敢不益勤綿力罔伏舊章期有補於萬分敢自憐  
於九殞

謝除樞密表

宋子京

近叨恩制俾正樞司伏閣上言願還於成命斷章催  
拜特枉於慈音固讓莫諧冒居何幸中謝竊臣液楛  
材散培塿地卑獲對聖期屢揚劇任敵王所愾既會

於偃兵積日之勞何從而塞責洪惟職覆深諒由哀  
斯謀斯猷則罕嘗入告予求予取則不議汝瑕由先  
帝之舊人貳禁庭之幾事屬圖考室兼議僭功燕寢  
乃安顧成並享紀年肆四省捨爵計功首膺無虧之言  
已渙於宣之數僭夫國典布在人言匪謂天眷謬加  
寵章尤渥靡論彝序超據上游壅薄訴於危心隔蓋  
高之善聽光華異等震忤衷懷三接諮諏未識主臣  
之對萬機處可曷臻密靖之風乘是泰來缺然虛受  
此蓋伏蒙皇帝太后陛下道敷之善養使人不備求貸衛  
綰之孰何取子顏之謹質特捐厚禮期責寸長願懋

賞以不賞誓捐軀而有所

謝除樞密表代

汪彥章

本柄於中久<sub>汙</sub>樞機之地進班其首更叨綸綍之恩  
蒙睿獎之非常私瑣材而不已安危所繫榮懼交深  
中謝竊<sub>伏念</sub>臣生江湖之鄉非廊廟之器偶扞防於牧圉  
蒙記錄於冕旒當中興無文武之才有慙吉甫乃一  
見受腹心之寄自比留侯薦膺推擇之榮遂處弼諧  
之任謀參帷幄職總韜鈴永言國步之屯方賴廟謨  
之勝外有交侵之強敵<sub>虜</sub>內多竊發之奸民兩河未復  
於輿圖二聖尚勞於岳狩非兵莫濟得士斯昌豈伊

章句之腐儒堪此朝廷之大任茲蓋伏遇皇帝陛下  
治先稽古志在宅中躬堯舜之仁雖欲躋民於富壽  
據高文之憤不忘克己於憂勤詳延左右之臣猥及  
下中之品臣敢不兼收羣策務究遠猷念國家嘗膺  
之憂適當今日豈臣子捐軀之報敢<sub>後</sub>役古人

謝除樞密表

歐陽永叔

右樞虛府充位宜求於雋賢多士盈庭<sub>伏念</sub>誤選乃<sub>先</sub>厠於  
庸妄既牢辭之靡獲徒以寵而為憂中謝竊<sub>伏念</sub>臣少本  
賤愚初無志慮為小人之事力不勝於負薪程有司  
之文學止期於干祿過被仁恩之樂育早從英俊之

並遊遂叨侍從之流久玷論思之地方時求治殆無  
補於分毫顧質早衰况漸凋於齒髮但思藏縮敢望  
甄陞矧惟贊萬事之機必也極一時之選豈容濫得  
猥以備員當令命之始行方惶惑以失措而睿思至  
渥召旨甚嚴莫諧懇避之誠徒負貪榮之媿此蓋伏  
遇皇帝陛下廓天地之量垂日月之光憐樸直之無  
他謂疲駑之可勉俾承缺乏以効拙勤臣敢不奮勵  
無能之姿感激難遇之會職思以位庶免於曠官謀  
不以身少期於報國

參政謝除參知政事表

楊大年

臣某言臣近者虔拜封章乞歸班列忽奉手詔不賜  
允俞仰睿旨之丁寧撫微躬而戰慄欲更披於肝膈  
慮有贖於君親中謝伏念臣孤直寡徒頑疎無取章句  
之學僅能齒於諸生清白之規固克傳於奕世自策  
名筮仕陳力當官塵右掖之清華踐內庭之嚴秘乃  
至典樞機之務參輔弼之司並由褫冕之誤知豈副  
縉紳之公議小器固難於大受高位唯恐於疾顛夙  
夜在公雖黽勉而從事負乘致寇亦蹈踏之靡違今  
睹訟起下民辭連執政憲府職當於推鞠獄情遽至  
於矯誣既閱實以平反爰舉直而措枉已從明辨式

正常刑其如中司長官是臣外舅踐文昌六卿之責  
昧園扉兩造之辭名挂簡書身繫非所實朝倫之共  
恥在戚屬以何顏是用瀝懇紫庭祈恩丹宸願退歸  
於散地庶允洽於至公豈謂皇帝陛下推洪覆之深  
仁示曲成之立造特頒泥檢俯示綸言徵周書之舊  
章以其罪不相及推漢高之大度且復待之如初仰  
承雨露之私內積冰淵之懼瀆尊之罪固不可以再  
三許國之心但益堅於方寸誓殫臣節上答天慈

謝除參知政事表

王瞻叔

備諍臣而論指蔑著顯庸躋政地之以出綸驟膺親擢

控誠忱之懇切辱訓誥以頻煩拜命若驚省躬甚惕  
中謝竊以虞舜紹唐堯之緒五臣舉而至治章武王  
恢周室之基十亂升而大勳立惟輔理承化者非一  
賢之略必同寅協恭而廣衆正之求矧今三邊未寧  
庶事多舛民生尚困國是易搖天災時變之占日深  
寅畏旰食宵衣之慮特軫憂勤陛下妙簡臣隣旁招  
俊哲列之承弼責以謀謨蓋將外撫四夷內修百度  
振藝祖創垂之統酬光堯付託之誠自非兼文武之  
弛張効忠嘉之啟沃學據古今而通其變才周軍國  
而措之宜則何以上贊宸猷下符僉論如臣者斗筭



小器鉛槧腐儒徒以險阻艱難之備嘗稍諳俗狀故於東西南北之不擇自勵公功程久絕望於榮途復何心於晚節向者召從巴蜀歸覲闕庭初無左右之容遽被神明之照未更一歲殆及九遷版部銓曹綴獻納論思之末禁林諫苑充文詞言語之官皆暖席之未違已抗禮而於邁心欲為而不逮者精力勞則有而何補於事功遲休榆塞之防秋便老菟裘而卒歲敢期僥倖乃爾超逾除二府之自外方追慶歷名臣之殊遇由七人而參大政實本朝累世之罕聞萃此寵光若為負荷茲蓋伏遇皇帝陛下聖聰旁達睿斷

無疑昭讒誣於七政之明定許予於四時之信祇承於帝思鋪張不世之休無競惟人每夢想非常之士遂令猥瑣亦玷登庸臣敢不鞭策疲駑支持衰病仰體丁寧之旨對揚特達之知際會風雲方快觀亨嘉之會奉承教令期助成宏遠之規臣無任

謝除參知政事表

歐陽永叔

贊貳國鈞參聞妙論謂宜不決次而選冀得非常之材乃以叙遷俾之承乏誤思過被訴讓靡從中謝伏念臣少迫賤貧偶勤學問儒者博而寡要况非多聞文章世之空言豈能適用徒以早邁亨嘉之會驟蒙獎擢

之私叨言語侍從之流逮今踰紀玷出納樞機之任  
初乏可稱幸先彈理之未加每欲逡巡而引去敢期  
睿眷俾與政機優以寵章進其爵秩望非意及崇與  
憂并此蓋伏遇皇帝陛下堯德聰明禹<sub>躬</sub>勤儉博求  
俊<sub>人</sub>以濟治康謂臣既樸且愚必能循於忠謹雖庸  
而陋尚可策其疲駑猥以備員遂茲冒寵敢不益堅  
素守自勉不強為<sub>惟</sub>彈<sub>彈</sub>犬馬之勞上答乾坤之造

謝除參知政事表

王介甫

承<sub>弗</sub>弼之任賢智所難顧惟缺然何以堪此仰膺成命  
獲固辭中謝竊以古先哲王考慎厥輔皆有一德用

成衆功伏惟皇帝陛下含獨見之明踐久安之運甫  
終諒闇將大施為宜得偉人與圖庶政如臣者徒以  
承學粗知義方本無他長可備官使退安私室自絕  
榮途既負采薪之憂因逃竊位之責大明繼燭正路  
宏開付以蕃宣還之侍從清閒之宴或賜開延淺陋  
所聞每蒙知獎以為奉<sub>承</sub>教庶幾無尤當軸處中良非  
所稱龍光曲被震媿交懷此蓋伏遇皇帝陛下德茂  
旁求忠<sub>志</sub>存遠舉隆寬盡下故忠良有以輸心公聽並  
觀故讒慝不能肆志矧睿謀之天縱方聖治之日躋  
思稱所蒙敢忘自竭遠猷經國雖或媿於前修直道

持卷九年

事君期不墮<sub>腹</sub>於素守

謝除昭文相公表

王介甫

承流宣化深虞失職之誅經體贊元更誤選賢之舉  
中謝<sub>臣</sub>竊惟人物之會通常寡實以君臣之遇合至難  
自匪同聲氣之求孰能偕功名之享伏惟皇帝陛下  
天縱大聖人與成能乘百年久安之誠飾千歲積壞  
之蠱士誠服矣而持祿養交之習未殄民允懷矣而  
樂事勸功之志未純近或長阨而仁義之澤未流遠  
或虛憍而道德之威未立宜選於眾舉格于皇天之  
材使暨乃僚纘迪我高后之事冀勝所任以濟斯時

而臣蚤見知於隱約之中久獨立於傾搖之上勲庸  
弗効恩禮更加託備外藩俯隣暮歲遂叨詔獎還冠  
宰司自視羈單所懷蹇淺方古耕築則有其陋為世  
聘求則無其賢然以投老之軀而遭難值之運苟貪  
歲月趣就涓埃且上之施既光則下之報宜厚與之  
戮力仰承睿智之臨罔不同心俯賴忠良之協誓殫

疎拙圖稱休明

尚書侍郎  
謝除吏部尚書表

顏思魯

吏曹兼組僅輸累月之勞帝宸疏恩遽陟三銓之首  
居然就職惕爾懷慙臣<sub>某</sub>謝伏念臣初無適時可用

之才徒有泥古不通之學握從臣之橐俯仰四方使  
老上之庭往來萬里歎賢勞之何有荷聖曠眷之過優  
既叨小宰之除復攝冢卿之乏而臣技窮能薄景迫  
年侵存騰告老之章未動蓋高之聽徹圖簡記反使  
甄陞維為天官分典於銓衡而嘗帝伯實提其綱領頃嘗  
兼掌猶懼弗勝茲命顯官益虞非據并賜身章之寵  
仍頒旒乘之珍顧異數之駢蕃將何功而稱塞茲蓋  
恭遇皇帝陛下規模天大睿智日躋照臨博暨於羣  
工禮遇尤先於近列知臣樸忠有守寒松不改於凋  
年憐臣氣力未衰老馬或諳於故道迺願茂渥猥及

受當作受其下尚  
朕一字

微蹤臣謹當仰體隆私益堅晚節壯心雖在詎敢受  
於糜捐來日無多終願祈求於閒退

謝除禮部尚書表

王蘭

外閭躉分遽歸於驛昨朝甫對即擢長於春官  
席寵踰涯撫鄒增懼中謝伏念臣奮身孤遠逢世休  
明仕不因人終始皆蒙於睿簡才非適用險夷但信  
於愚忠去國倚廬起字臨鎮豹尾隔四年之從麟符  
專一道之權問果里之歎愁具知疾苦頌詔條之寬  
大方究撫綏敢圖宣室之興思誤玷中臺之率屬跡  
陪鵷鷺之悅疑夢寐之回屢上星辰頓覺依乘之近

被服章之安吉引駒轡之間馳榮渥併加微軀難稱  
茲蓋伏遇皇帝陛下聖聰建極知哲能官聚英雋以  
尊朝蓋為本根之慮咨直清而典禮不徒玉帛之云  
退省迂儒曷膺妙選臣敢不益堅素守仰副隆知願  
惟斗喉舌之司當勤出納如稽古禮文之事敢廢討  
論

謝除刑部尚書表

歐陽永叔

職清書殿實為儒者之榮望峻天臺仍忝刑官之重  
內循謏薄仰玷光華中謝竊<sup>伏念</sup>臣稟質迂愚粗知踐履  
因時幸會遂竊寵靈無拾遺補闕之功常陪法從非

大冊高文之手久廁翰林晚綴宰僚俾聞國論荷三  
朝之眷遇每察懦衷幸四海之清平得容尸祿居滿  
盈而不戒積災釁以自貽屬聖統之嗣興赫皇明而  
繼照誣言詰服已大釋於羣疑危跡俾<sup>保</sup>全<sup>保</sup>不虧於  
素守犬馬合思於報効桑榆奈迫於衰遲屢貢懇私  
上干聰睿遂蒙開允俾解繁機然而晚節餘生本期  
避寵清資顯秩益更貪榮被優渥之非常但凌競而  
失措此蓋伏遇皇帝陛下聖神御極亭育推仁閔孤  
拙之危勢無容自立謂疲駑之力竭難責遠圖曲軫  
至慈俯念誠請仍憐舊物特示殊恩顧非木石之頑

持斧先生

宜識乾坤之造，颯然素領，雖難強於筋骸，皎苦丹心，猶自期於塵露。

謝除吏部侍郎表

歐陽永叔

驟膺渙號，備瀝愚誠，雖至辭窮，罔避煩言之為黷重，乎令出莫回，成命於已行，祇受以還，驚惶失節，中謝伏念竊臣學不通於原本材，不足以經綸，但知守拙，以為忠，每務師心，而自信，徒以遭逢先帝，拔自眾人，參侍從之，聯遂玷機衡之貳，而屬大橫，啟運兆嗣統，膺期方為政之清明，思百度之修理，內量謏薄，實憂以聖而責，愚矧迫衰殘，方念乞身而告病，不謂皇慈，曲被寵

數屢加當，覃大慶之初，已無功而冒賞，曾未踰年之久，復進秩以叨榮，此蓋伏遇皇帝陛下，聖政維新，用人務廣，謂才難於求，備思悅使，以忘勞憫，其勤劬錫以優洽，雖榮踰於望表，亦寵與其憂，并誓殫犬馬之微，少答乾坤之造。

謝除戶部侍郎表

蘇子由

掖垣清秘，閣奉鉛槧，以媿安民部劇煩，以錢穀而為職事，非素學命，不獲辭中謝伏念竊臣起於南裔，曾未再暮，擢在近班，訖無少補，開口論事，適宸心延納之初，引筆代言，非書命縱橫之際，竊祿而已，功何足云，計日

以言時亦未幾方自憂於汰去豈復意於超升此蓋  
伏遇太皇太后陛下仁聖無為靜深照物坐閱工師  
之眾灼知情偽之端察臣攢愚憐臣孤遠才雖未能  
以應務性則不喜於為邪試之劇曹冀其來效然臣  
觀當今<sup>所</sup>部之政正直<sup>值</sup>昔日新法之餘召募憂於殘  
荒差繇患於戶少事既難辦法當通方尚賴聖算之  
明稍寬民力之憊臣之疎拙徒自勉强苟少緩於瘡  
痍亦圖報之萬一

謝除戶部侍郎表

晁無咎

典三禮於曲臺已冒高華之選貳六卿於民部遽登

峻近之班力陳祈免之忱辭終奉莫回之溫詔爰賜  
九環之帶仍班列采之衣寵賁其蕃凌競<sup>競</sup>失措中謝  
<sup>伏念</sup>竊臣初無時譽獨有家聲莫傳屋壁之遺編僅繼山  
林之末續好為異論每與世疎喜作文章矜求古合  
依徊平進坎珂數奇事鉛槧於書林樂絃歌於學省  
曳裾而位王傅佩玉以陪禮官之歲奏之體而掌端  
錦於南宮非應接之才而駕軺車於北道黃緣賜對  
懇切獻忠明言趙魏<sup>趙魏</sup>之郊卒徒<sup>卒徒</sup>孔熾極論幽燕<sup>幽燕</sup>之域  
疆場弛嚴謂新民<sup>新民</sup>初服<sup>初服</sup>之可防繇殊<sup>殊</sup>方舊習<sup>舊習</sup>之不變  
荷上皇之嘉納仰聖度之優容偶道邦刑亟遷宰旅

徒悉心於綱目曾何補於彌綸圍城之變忽生造膝  
之言良驗自罹兵革益困簡書心志摧頽形神凋耗  
獲辭劇任復處清流因贊道而覩二聖之重歡預討  
論而創兩宮之新禮國步稍定私志或伸念八載之  
居中丐一麾而補外居叨異數俾踐禁途超跳等夷  
愧負流輩惟常平之美號本廣惠之舊規加捐益於  
前朝浸乖墮於今日儲蓄竭公私之橫費新陳乘散  
斂之虛名方師旅之未寧慮水旱之或繼田廬戕毀  
以幾盡老稚流徙而不歸要當貸而不償是謂積而  
能散極茲古弊宜屬俊良茂聞下才克堪重寄此蓋

伏遇皇帝陛下天臨九有子育羣黎攬英俊之奇謀  
共禱初載監祖宗之成憲圖致中興念臣專留意藝文  
蓋將議以吏治察臣粗知體要或可備於後官臣敢  
不仰稱所蒙俯修厥職錢穀之間明其不至於廟堂補  
助之仁願廣推於寰海雖簿書期會之是務豈論思  
獻納之敢忘披黃卷以接聖賢顧尚存於舊習錫金  
魚而因政事功自比於昔人

謝除戶部侍郎表

歐陽永叔

皇明繼照如日之升睿澤霽流溥天咸被時惟朽懦  
亦玷清華中謝伏念竊臣本以庸虛僅知學問識不周於



時用材莫逮於中人方其壯年喜論時事名聲濫得  
招謗咎以偕來榮寵踰涯蹈憂危而亦至晚被先朝  
之誤獎俾陪二府之後塵居無補於休明方自期於  
引避遽疏弓而結恨雖殞體以何追伏遇皇帝陛下  
奮發乾剛嗣承天統當茂業繼文之始及歡謳歸啟  
之初宗社獲安人神洽慶矧惟新之號令方無間於  
幽遐顧於茲時其敢獨異俯從祇受但益凌兢兢臣敢  
不勉勵衰殘感遇今昔更竭疲駑之効庶伸塵露之  
微

謝除禮部侍郎表

張全真

病衰自列念無補於艱危睿眷兼容尚叨塵於嚴近  
循牆莫獲踏地難勝中謝伏念臣竊第於上皇臨御  
之初久服勞於州縣賜對於陛下中興之旦遂叨侍  
於冕旒存充耳目之官圖竭股肱之力愚非一得窮  
有百罹精神疲於思慮之煩疾瘁甚於驚憂之後力  
致顛天之懇仰丐投閒敢懷擇地之私但期遣責逮  
辭榮於專席乃承乏於貳卿將使論思則已試罔功  
復有曠瘵之懼止充員品則於時多故豈無尸素之  
慙具瀝危衷繼申前請敢謂包荒之度特寬犯上之  
誅傳溫詔之褒揚曲煩近弼察寒蹤之孤藐留寘本

朝仰厚惠之不貲揆初心而有覲強顏就列力疾造  
庭此蓋伏遇皇帝陛下駕馭英豪而大有為拔去凶  
邪而罔不服優容臺諫廓通遐邇之情眷禮臣鄰曲  
盡始終之遇顧茲蕞質亦玷鴻私念正人端士之言  
書生紳自勵報厚地隆天之施刻骨為銘

謝除兵部侍郎表

汪彥章

東省瘳官方祈病免中臺分掌乃誤優遷資逢世以  
非宜寵踰涯而益懼中謝伏念竊臣江湖遐裔章句小儒  
才不過庸僅及下中之品學雖忘老安知左右之原  
偶陪多士之升幸備公朝之選徧誇清貫遂綴通聯

旋遭值於干戈獲奉承於羈勒才因事見初無橫草  
之功災與衰期乃有負薪之疾屢投誠於魏闕將歸  
卧於漳濱猥蒙內史之書俾適文昌之秩戎昭所繫  
儒緩奚堪茲蓋伏遇皇帝陛下睿智有臨憂勤無逸  
光復祖宗之舊既已配天兼收文武之長未嘗愒日  
唯臣瑣質負國明思竭股肱之力而徒有此心譬腹  
背之毛而何裨於用耗藥廩食羞愧神明不辭勉効  
於秋毫願恐溢光於朝露周六典治厄之職雖幸叨  
居漢九卿賜告之恩終期得請

謝除兵部侍郎表

呂安老

荷恩深厚撫己驚慙中謝竊以六部貳卿九重從列  
非耆老久次不任倚毗惟師友淵源始知堪獻納况屬  
艱危之運而躡英俊之躔士以為榮時所宜重如臣  
者至愚極陋多質少文抗志雖慕於古人問周己不逮  
於時輩徒襲舊學嘗聞師言以為君子之仁貴克己  
以濟物至若人臣之義在尊主以范民有志於道德  
則功名自來無負於國家則爵祿可享事在勉強奉  
以周旋顧險阻之備嘗守迂愚而自信頃從疎逖數  
冒親除當言責於渡江再造之初奉使事於羣盜紛  
起之際出入帥閫陪大將以宣威入綴省聯佐弼臣

而布治坐閱歲時之久蔑聞尺寸之勞方草疏以投  
誠覬請郡以自効豈期僥倖有此超踰此蓋伏遇皇  
帝陛下道法祖宗功加寰海思起大化辨邪正以審  
官務抑虛名分怠勤而察吏知臣不善於諂媚謂臣  
稍歷於劇煩故略其愚欲試以用受知如此論報謂  
何臣敢不仰服訓詞益堅素履深慕惟志士殺身以成  
仁忍做鄙夫既得而患失

謝除刑部侍郎表

任文薦

伏奉御筆除臣刑部侍郎尋具狀辭免蒙降詔不允  
者坐謫南州猶佩左符之寵歸瞻北闕載頌細札之

優顧遭遇之踰涯但戰競兢而出涕臣其中謝伏念臣學  
 由總角任己華顛姑惟竊祿以安貧詎識取塗而遽  
 要薦膺簡拔皆越等夷成均教導之官初慙虛受法  
 從論思之地亦輒冒居天地之施無私螻蟻之誠曷  
 報未知死所敢望生還昨緣封疆與賊為鄰保伍料  
 之微勞先擒敵將稍振軍聲設險則高壘深溝濟師  
 則飛芻輓粟寸心勞瘁左臂病孿方願投閒遽蒙趣  
 召茲蓋伏遇皇帝陛下軫憐舊物開示大公察其遜  
 跼之動宜有尊父之節試中執法既收無用之言擢  
 以司刑更責後來之效臣敢不益思許國毋憚殺身

第虞衰疾之侵終遂退休之請

謝除工部侍郎表

秦少游

入司太僕已慙稱效之虛進貳冬官尤愧選掄之誤  
 顧叨塵之已甚念辭避之弗容承命惟驚撫躬以懼  
 中謝伏念竊臣身承家訓世受國恩荷先朝特達之知蒙  
 二聖生成之賜左遷選都司之要既獲備員內閣秘殿  
 之嚴更容通籍以至外專兩郡內閣三卿徒為歲月  
 之淹莫先見事功之學方虞罷黜退伏於田廬敢意推  
 遷遽陪於法從材微任過恩重報難此蓋伏遇皇帝  
 陛下盛德海涵至仁天覆以臣父某歷四朝而被遇

登三事以退居知父子至情欲慰桑榆之景念君臣  
難遇誰收管蒯之才豈惟一敝族之榮時乃百執事  
之勸臣敢不鞭策駑蹇淬礪鈍頑以捐軀報國之誠  
為竭力事親之義

謝除男工部侍郎表代

邵公濟

下臣備位未施橫草之勞賤息蒙恩驟<sup>綴</sup>持荷之列  
更煩溫詔莫遂牢辭仰戴寵靈俯深感涕中謝<sup>伏念</sup>竊臣  
家聲寥落門望單平高曾繼世決科迄陸沈於州縣  
父祖同時抗賊成身沒於邊陲敢期草芥之微乃際  
風雲之會起家事主歷時俄冠於孤卿教子讀書接

踵亦登於省寺超踰若此人其謂何反復思之今不  
翅足荷聖恩之隆厚被親擢之光榮叨塵起部之聯  
密勿甘泉之侍舉族相顧共知雨露之偏隕首為期  
曷稱乾坤之造茲蓋伏遇皇帝陛下慎持八柄允釐  
百工有求忠臣於孝子之門使奏薄技於從官之內  
必當其位師師言具於羣材亦及爾私瑣瑣或塵於  
撫仕肆令么麼獲玷清光臣敢不祇服訓詞相勉忠  
義仰祁奚舉子之意曷繼前修慕孤突事君之言少  
圖後效庶殫皎報用答洪私

上  
空  
行

戊辰九月晦日梅宗刊本

聖宋名賢五百家播芳大全文粹卷三下